



N°1809
Entrée le 21.01.2025
Chambre des Députés
Déclarée recevable
Président de la Chambre des Députés
(s.) Claude Wiseler

Här Claude Wiseler

President vun der Chamber

Ministère de l'Agriculture
de l'Alimentation
et de la Viticulture

8

Référence : 45 / 20 25

22 JAN. 2025

Lëtzebuerg, de 20. Januar 2025

Här President,

A traiter par :

Copie à :

Esou wéi d'Chamber Reglement et virgesäit, bidden ech Iech, dës parlamentaresch Fro
iwwert **d'Konsequenze vun der Blozongekrankheet** un d'Madamm Ministerin fir
Landwirtschaft, Ernährung a Wäibau weiderzeleeden.

An engem Pressecommuniqué vum 29. Oktober 2024 huet d'Lëtzebuerger Veterinär- a
Liewensméttelverwaltung (ALVA) matgedeelt, dass d'Blozongekrankheet säit dem 1.
August 2024 a 488 Betriber nogewise gouf, an dass 1380 Déieren, dorënner 1228
Ranner, positiv op d'Krankheet getest goufen. D'Madamm Ministerin huet och
informéiert, dass d'Stierflechteet bei Ranner a Schof sech an der 43ter Kalennerwoch
(21.10-27.10) rëm um Niveau vum Virjoer agependelt hätt.

D'Stierflechteet ass awer just eng Auswierkung vun dëser Krankheet, an
d'Repercussiounen vun der Blozongekrankheet sinn och nach haut a ville Betriber ze
spieren.

Eisen Informatiounen no hunn de Moment vill Betriber am Beräich vun der
Mëllechproduktioun an der Rannerzuucht ze kämpfe mat Feelgebuerten, Feelbildungen
an neurologesch Problemer bei Kaalwer déi zur Euthanasie féieren, wéi och mat
Problemer bei der Trächtigkeet vun de Mammekéi. Wéi grouss d'finanziell Schied si
wäert sech iwwert déi nächst Méint a Jore weisen, mee de Risiko besteet, dass des
Auswierkunge vun der Blozongekrankheet negativ Repercussiounen op
d'Mëllechproduktioun, d'Zucht an d'Fleeschproduktioun wäert hunn.


D'ALVA huet am August 2024 e Formulaire zur Meldung vun anormaler Mortalitéit am
Zesammenhang mat der Blozongekrankheet verfaasst, fir esou eng besser Iwwersiicht
ze kréien.

An hirer Äntwert op d'QP n°1108 huet d'Madamm Ministerin erkläert, dass fir de Moment
weder eng eenzelbetriplech nach eng global offiziell Analys iwwert d'Schied, déi duerch
d'Blozongekrankheet entstane sinn, virläit. An hirer Äntwert op d'QP n°1218 huet
d'Madamm Ministerin weiderhi gesot, dass „vu dass de Servicer vum
Landwirtschaftsministère keng fiabel offiziell Zuelen iwwert d'Verloschter vun de
Betriber am Zesammenhang mat der Blozongekrankheet virleien“ et de Moment ze fréi
wier „fir schonn eng Ausso iwwert eng eventuell Entschiedegung ze maachen“. Si huet
erkläert dass de Ministère awer derbäi wier déi diesbezüglich Méiglechkeeten ze
analyséieren an och d'Situatioun am noen Ausland ze suivéieren.

An dësem Kontext erlaben ech mer et folgend Froen un d'Madamm Ministerin ze stellen :

1. Kann d'Madamm Ministerin d'Informatiounen zu den erhéichten Zuele vu Feelgebuerten, Feelbildungen, an neurologesche Problemer bei Kaalwer, sou wéi och Problemer bei der Trächtigkeet vu Mammekéi confirméieren? Wa jo, wat ass d'Envergure vun dëse Problemer ? Ginn dës Phenomener statistesch erfaasst a wa jo kann d'Madamm Ministerin eis d'Variatiounen am Verglach zu de Virjoren duerleeën?
2. Wéi géif d'Madamm Ministerin déi méi mëttelfristeg Auswierkunge vun der Blozongekrankheet aschätzen?
3. Wéi gedenkt d'Madamm Ministerin virzegoen, fir eng global offiziell Analys ze maache vun de Schied, déi duerch d'Blozongekrankheet entstanen sinn ?
4. Fir des Schied besser ze erfaassen, wier et net sënnavoll fir nieft der anormaler Mortalitéit vun Déieren nach aner Effekter ze erfaassen (Impakter op d'Mëllechproduktioun, Feelbildung respektiv neurologesch Problemer bei Kaalwer, asw.)? Wa jo, wéi eng Schied fënnt d'Madamm Ministerin relevant an dësem Kontext, a wéi gedenkt si dëst ëmzesetzen ?
5. Wéi hunn der Madamm Ministerin hir Iwwerleeunge par rapport zu eventuellen Entschiedegungen evoluéiert säit hirer Äntwert op d'QP n°1218 ? Gedenkt d'Madamm Ministerin finanziell Hëllef auszeschaffen fir d'Betriber ze ënnerstëtzen déi impaktéiert si vu Feelgebuerten, Feelbildungen a neurologesche Problemer bei Kaalwer déi zur Euthanasie féieren, respektiv vu Problemer bei der Trächtigkeet vu Mammekéi? Wa jo, wéi eng Mesur sinn an dësem Kontext ugeduecht ? Wann nee, wat sinn d'Grënn dofir?
6. Wéi een Informatiounsautausch gëtt et de Moment tëscht de Landwirten an dem Ministère respektiv der ALVA, fir déi negativ Auswierkunge vun der Blozongekrankheet beschtméiglech ze navigéieren an zukünfteg Verloschter an dësem Sënn ze verhënneren ?

Mat déiwem Respekt,



Joëlle WELFRING
Députéiert



Äntwert vun der Ministesch fir Landwirtschaft, Ernährung a Wäibau op d'parlamentaresch Fro n°1809 vun der éierbaren Deputéiert Joëlle Welfring

- 1. Kann d'Madamm Ministerin d'Informationen zu den erhéichten Zuele vu Feelgebuerten, Feelbildungen, an neurologesch Problemer bei Kaalwer, sou wéi och Problemer bei der Trächtgkeet vu Mammekéi confirméieren? Wa jo, wat ass d'Envergure vun dëse Problemer? Ginn dës Phenomener statistesch erfaasst a wa jo, kann d'Madamm Ministerin eis d'Variationen am Verglach zu de Virjoren duerleeën?**

Als Konsequenz zum Ausbruch vun der Blozongekrankheet, konnten och zu Lëtzebuerg erhéichten Zuele vu Feelgebuerte festgestallt ginn. Bei den Autopsie vun dëse Feelgebuerte konnten och déi typesch BTV-Mëssbildungen wéi z.B. Waasserkapp, ënnerentwéckelt Gehier oder aner Organmëssbildungen festgestallt ginn.

De Feedback vun de Betriber ass, dass d'Kaalwer, deenen hir Mammen un der Blozongekrankheet erkrankt sinn, generell méi fréi op d'Welt kommen (Fréigebuerten) an doduerch oft net gutt un d'Liewen adaptéiert sinn. Bei deene Kaalwer sinn z.B. d'Longen nach net fäerdeg entwéckelt oder ass opgrond vum Feele vu Biestmëllech bei der Mamm hir Immunitéit reduzéiert.

Vun Anproblemer bis hin zu blannen Déieren oder Kaalwer, déi am Ufank méi Ënnerstëtzung (z.B. beim Drénken) brauchen, gëtt beriicht. Vun Trächtgkeetsproblemer bei de Mammekéi gouf och als Konsequenz vun der Blozongekrankheet beriicht.

Zu dem aktuellen Zäitpunkt leien eis keng statistesch erfaassten Zuelen zu dëse Problemer vir. Et ginn awer extern Institutiounen, déi Zuele bezüglech der Mëllechleeschung an Trächtgkeetsproblemer erfaassen.

- 2. Wéi géif d'Madamm Ministerin déi méi mëttelfristeg Auswierkunge vun der Blozongekrankheet aschätzen?**

D'Blozongekrankheet huet zum Engen ee groussen Impakt op d'Déierewuel, well Déiere krank ginn, awer och op d'Wirtschaftlechkeet vun de Betriber, well d'Produktiounsleeschung am Fall vun enger Infektioun gefall ass. Elo, wou déi akut Phase sech berouegt huet, sinn d'Spéitfolgen op de Betriber ze spieren. Et ass wichteg, d'Déiererepopulatioun dëst Joer duerch Impfung beschtméiglech virum Virus ze schützen, fir de Schued (ekonomesch an Déierewuel) esou kleng wie méiglech ze halen.

- 3. Wéi gedenkt d'Madamm Ministerin virzegoen, fir eng global offiziell Analys ze maache vun de Schied, déi duerch d'Blozongekrankheet entstane sinn?**

- 4. Fir des Schied besser ze erfaassen, wier et net sënnvoll fir nieft der anormaler Mortalitéit vun Déieren nach aner Effekter ze erfaassen (Impakter op d'Mëllechproduktioun, Feelbildung resp. neurologesch Problemer bei Kaalwer, asw.)? Wa jo, wéi eng Schied fënnt d'Madamm Ministerin relevant an dësem Kontext, a wéi gedenkt si dëst ëmzesetzen ?**

Vu dass d'Schied op de Betriber ganz ënnerschiddlech sinn, misst ee fir eng global Analys ze maachen d'Donnée vum all eenzele Betrib sammelen an auswäerten. Bei der Blozongekrankheet ass den direkten Impakt (erhéichte Stierflechkeet, Réckgang vun der Mëllechleeschung) awer och den indirekten Impakt (Feelgebuerten, Mëssbildungen...) op de Betriber feststellen. Besonnesch déi indirekt Schied kënnen opgrond vun engem Mangel un Informationen nëmme schwéier groussflächeg erfaasst ginn. Am Géigesaz dozou kann d'Stierflechkeet op de Betriber besser erfaasst an analyséiert ginn, well all Betrib seng doudeg Déieren iwwert eng Firma entsuerge léisst. Unhand dovun konnten och statistesch Auswäertungen zur Iwwerstierflechkeet am Verglach zu anere Joren gemaach ginn.

D'Impakter op d'Mëllechproduktioun esou wéi Trächtigkeet bei Mammekéi (Repro-Check) gi vun externen Institutione scho stéchprobenarteg statistesch erfaasst. Wann et zu enger Analyse vu Feelgebuerten am Laboratoire vétérinaire et alimentaire (LVA) kënnt, hu mir Informatiounen zu de Mëssbildungen, déi stattfonnt hunn. Dozou muss een awer soen, dass et oft nëmme stéchprouwenaarteg zu Analyse vu Feelgebuerte kënnt. Grondsätzlech iwwerschneiden sech eis Feststellungen mat deenen, déi och schonn an anere betraffene Länner gemaach goufen. De gesondheetlechen an ekonomeschen (Mëllech- a Fleeschproduktioun) Impakt op de Betriber ass grouss, dofir sollt preventiv alles gemaach ginn, fir seng Betriber ze schützen.

5. **Wéi hunn der Madamm Ministerin hir Iwwerleeunge par Rapport zu eventuellen Entschedegungen evoluéiert säit hirer Äntwert op d'QP n°1218 ? Gedenkt d'Madamm Ministerin finanziell Hëllef auszeschaffen fir d'Betriber ze ënnerstëtzen, déi impaktéiert si vu Feelgebuerten, Feelbildungen a neurologesche Problemer bei Kaalwer, déi zur Euthanasie féieren respektiv vu Problemer bei der Trächtigkeet vu Mammekéi? Wa jo, wéi eng Mesurë sinn an dësem Kontext ugeduecht ? Wann nee, wat sinn d'Grënn dofir?**

Bedéngt duerch de Fait, dass de Ministère eng Assurance kofinanzéiert, déi Perten ofdeckt, déi duerch Déierekrankheeten ervir geruff ginn, ass et net méiglech, zousätzlech Schied, déi duerch d'Blozongekrankheet entstan sinn, ze entschiedegen. Niewt dem Iwwerhuelen vun den Assurancen zu 65%, huet de Ministère bis dato schonn ronn 3,6 Milliounen Euro fir d'Bereetstellung vum Impfstoff an d'Ausféierung vum Impfakt duerch de Veterinaire virgesi bzw. ausbezult.

5. **Wéi een Informatiouns Austausch gëtt et de Moment tëscht de Landwirten an dem Ministère respektiv der ALVA, fir déi negativ Auswierkunge vun der Blozongekrankheet beschtméiglech ze navigéieren an zukünfteg Verloschter an dësem Sënn ze verhënneren ?**

Iwwert follgende Link kann den aktuellen Informatiouns Austausch „Freiwillige Impfkampagne 2025 gegen BTV und EHD“ nogelies ginn.

<https://agriculture.public.lu/de/aktuelles/2025/januar/impfkampagne-btv-ehd.html>

Op Wonsch vum Secteur huet de 26. Februar 2025 di éischt Sitzung vun der Taskforce Blozongekrankheet /Epizootisch Hämorrhagie am Ministère stattfonnt. Dës Taskforce besteet aus Membere vum Landwirtschaftsministère, der ALVA, der Landwirtschaftskammer a Convis a soll an Zukunft den Informatiouns Austausch betreffend der Iwwerwaachung a Bekämpfung vun Déierekrankheete verbessern.

Lëtzebuerg, den 3. Mäerz 2025

D'Ministesch fir Landwirtschaft, Ernährung a Wäibau

(s.) Martine HANSEN